

四庫全書

集部

欽定四庫全書

集部

榕村集卷二十七

詳校官侍讀學士

臣法式善

助教

臣常循覆勘

總校官知縣

臣總

琪

校對官學正

臣翁

樹棠

謄錄監生

臣

鄒世俊

欽定四庫全書

榕村集卷二十七

大學士李光地撰

疏二

請嚴定承審命案處分疏

康熙四十年十月初一日

臣李光地謹題為請嚴承審人命之例以杜弊端以免淹累事竊臣蒙

恩簡畀畿輔重任日以鰥曠職守為兢兢俯惟吏治民

生之要莫如錢糧刑名二事倘積案不清曠日持久未有不為叢弊之數者臣前因屬員錢糧虧空其是侵是那之處積年不行審明曾經陳請嚴定承審期限之例已奉

旨欽遵通行在案伏查刑名中最重大者乃命案盜案而命案又與盜案不同蓋盜案內或有渠魁未獲等候提拿或有贓證未明須待質對更有官役人等挾仇扳誣賄買銷案指良為盜等項必須反覆研審真情原非

可以速結之事至人命一項雖有謀故仇鬪之分然斃命告官之日原被証佐多係同邑同里之人承問官立可勾拿質審如真兇果有脫逃未獲又例不扣限非如盜案未經獲賊先行勒限緝拿者可比所以命案從前原與盜案俱扣限一年後因人命易結改限半年在案今各州縣于人命事件告官通詳後或已犯證提齊情是真實而乃塵積一二年不行招解且有賄囑道府托故番駁改招易罪等弊以致命案久懸每難審結臣思

命案若克犯證佐已經到案承問官秉公察審斷無難結之理只因地方官遇有人命之事或為權勢制壓或以利慾薰心故為遷延遲緩以圖出入開脫之法且又事情重大耳目難欺一則牽於財勢一則怯於公論遂拖延歲月意在監斃原告以滅口完案者更有聽惡役借端苛索無故牽連鄰里株連無辜名為研審真偽實係借命居奇者種種弊竇總以命案限滿不過以遲延題參而承審有司罪止罰俸未有嚴定上下處分以致

任意稽延歷年積歲事久則要挾營求者愈多獄淹則疾病死亡者益衆而且波累良民匍匐千里羈留一二年不得耕商生理者一案之中動以十數誠不可不嚴立承審限期以求速結而清弊端也臣請將一切命案照例勒限半年專責巡道嚴催府州縣速行完結如初次違限不結指參仍照常例議處外自參遲延後又有四月之限儘可審解如再有不結復行揭參遲延者必將巡道府州縣上下承問各官亦照臣題定承審虧空

新例以易結不結嚴行參處如有聽訟不平鍛鍊失實等項另行嚴查究劾庶命案無久稽之虞而刑名之弊可清官吏之奸可破囹圄可無幽滯而良善得以安生矣伏乞

勅部議覆施行

覆廣平縣不可築堤疏

康熙四十年十月二十六日

臣李光地謹題為欽奉

上諭事恭惟

皇上念切民生修防水利近以永定河清河各處工完沿河田畝漸次涸出復念廣平縣當漳水之衝其田上多有被淹特差臣等察勘此誠已溺已饑之盛心也臣等查勘得廣平縣係歷年積水所佔田地拋荒頗多今臣親看得該縣東西水淹之地長六十里廣七里俱生短雜蘆葦百姓歷年未能耕種經今道府縣丈勘查明被淹田共二千一百四十一頃零但該縣一帶土鬆河深從來漳河遷徙不定開河則旋淤築堤則旋塌詢之

鄉紳士民咸稱不可築堤且厯考漳河經由之處所淹不過一縣如以前曲周肥鄉成安等縣水淹地方今皆已涸出其成沃壤不過目前被水之縣耕種維艱該地方官民惟有仰希

聖恩於被水鄉村暫除一年錢糧容其將就食近縣之民招回墾種如明年河道遷流水勢消涸則所淹田畝悉可耕種下年即行照舊起科如明年水勢未消則仰乞

聖恩再蠲一年總以荒田墾種之年即為起科之限而一邑數十鄉村之民可以稍蘇矣臣等愚昧所及伏乞
睿裁

覆漳河分流疏

康熙四十年十月二十六日

臣李光地謹題為欽奉

上諭事臣等欽奉

皇上面諭漳河現在分流須令永久分流纔好若并而歸運則於漕道有妨并歸子牙河則民田受害爾等再

往詳看來奏欽此臣等遵奉

諭旨查看得現在漳河分為四支一支自直隸大名府之魏縣元城縣流至山東館陶縣地方歸衛入運一支由直隸廣平縣至山東邱縣地方復分為二其一俗呼老漳河自邱縣東北分流經直隸之威縣南宮棗強景州武邑阜城交河等地方至清縣杜林木村與完固口之支流合至鮑家嘴歸運又其一俗呼小漳河亦自邱縣西北分流經直隸之鉅鹿廣宗平鄉至寧晉與滏河

會又經東鹿冀州與漳沱河會由衡水至獻縣完固口
復分為兩支自完固口流至清縣會老漳河至鮑家嘴
歸運一支經河間大城為子牙河出王家口歸淀查漳
河現在末流所分四支三支歸運一支歸淀然歸運三
支水勢頗弱其歸淀一支水勢獨強約其水勢三支之
水僅可以敵一支是則此時漳水一半歸運一半歸淀
運道既無難受之虞子牙河亦得分殺之勢誠有如
聖諭所云者臣等竊觀此時水勢惟經寧晉冀州會滏

河沱河一支最為深通其歸館陶及清縣入應之兩支水勢頗淺或恐將來淤塞臣等議得應令所經由各地方官每年於水未發分段挑濬臣等按季察視務令此兩支俱疏通無滯以殺小漳河之勢如遇水大時仍用挑水壩等法逼水分流庶幾壯不至挾漳沱以侵田南不至合衛河以害運臣等愚陋之識未必有當伏乞

皇上訓誨指示遵行

請興直隸水利疏

康熙四十一年八月二十六日

臣李光地謹題為請興行水利事臣惟畿輔荷蒙

聖慈濬河築堤蠲租除逋連年五穀洊登雖下窪之地
俱免湛溺白叟黃童無不歌謳

聖德竊繹今春

聖訓深慮天行難恃申飭臣等預為之謀誠古帝王儆
戒無虞之盛心也臣惟屢豐者天心眷顧之常而備豫
者人事綢繆之責查北方土性往往苦旱為多然麥穀
黍豆之類原屬旱種稍得澆灌便獲收穫非若南方純

賴稻田必日日浸潤者比也直隸泉源甚衆隨處可以通溝灌田若近河鄉地則又可築壩逼水引渠廣溉至於無泉無河之處勸令民間鑿井亦足以濟水利之窮再如正定府之隆平寧晉冀州順德府之任縣廣宗鉅鹿廣平府之成安廣平肥鄉大名府之內黃南樂濬縣等處又苦於地窪水多各有應修應築大小河道必并去水之害然後可以興水之利也顧此興利大事必邀聖諭下頒乃可鼓舞吏民課其成效中間更有旗民鄉

紳豪富之地故意阻格者又有接連鄰省地界愚民爭執不容修濬者如係奉

旨事宜自然遵行不敢違撓又通溝鑿井修河等事雖出民力然多有貧民開濬無資者敢乞

聖俞暫借道庫量行資給如借至十五萬以上則容臣等三年捐俸補還十萬以下二年補還五萬以下本年補還再查近京處所通衢平野輦轂所經不便多行開鑿至於各府州縣窮鄉僻壤似皆可一例施行但事關

通屬利病臣愚陋之見恐無足採伏乞

聖明裁定謹題

覆糶積貯米石疏

康熙四十二年二月初八日

臣李光地謹題為移咨事康熙四十一年十二月十八日準戶部咨江南清吏司案呈康熙四十一年十二月十六日內閣來文內開戶部議給事中徐賓條陳州縣所存米石之事折本大學士馬奇等奉

旨預備存倉米粟關係甚要徐賓條奏之事著抄寫行

令各省督撫等照所奏應否可行之處各出意見明白
議奏欽此相應抄錄條陳原疏移咨各該督撫欽遵施
行計粘抄一紙等因到臣臣欽遵查得直隸各屬州縣
現存米粟以粟折米共不過一百萬六千五百四十九
石一斗二升零總數既自無多即各州縣中惟南宮南
樂長垣三縣過二萬石其餘多者皆不能滿二萬之數
少者不過數千而止耳如有賢能官吏設法收貯以時
晾晒亦可免浥爛之虞而不致有虧空之事今如將米

穀糶銀繳庫既恐日後一遇薄收價值騰貴買賑艱難又恐地方有司一奉賣銀解庫之

旨借名米穀陳腐相率以賤價希圖收受動煩增駁臣愚謂積米太多之處如南宮南樂長垣各縣可照科臣所陳各存二萬石餘者易銀繳庫但此繳庫之銀不許其零星賣交似應于每年各屬撥給兵餉項內就近將米穀搭放其餘州縣存貯原不至甚多者仍舊加謹存貯至每年出陳易新法非不善但地方官吏奉行未必

有方樂歲之民不願借糴官米則有勒買攤借之患如遇荒歉則秋成買補之時追比紛然民且重困今既多貯米穀之處減其額數則各處所存米穀皆不過數千至一二萬石仍嚴飭地方官設法收貯晾晒倘值收成歉薄之年應行發糴者呈詳題請可也理合具題伏乞勅部議覆施行

覆虧空霉爛米穀例疏

康熙四十二年二月初八日

臣李光地謹題為欽奉

上諭事康熙四十一年十二月十三日準戶部咨福建清吏司案呈抄蒙本部案驗江南清吏司案呈該臣等會議得康熙四十一年十一月二十五日

上諭大學士馬奇等各省府州縣經管錢糧官員虧空庫銀理合照定律處分賠補其虧空霉爛存倉穀石者既經賠完仍行治罪似屬太過且各州縣存貯米穀甚多倉廩不能盡貯在各處分貯且南省地方又係潮濕米穀易至霉爛爾等應與九卿會議具奏欽此仰惟我

聖主洞鑒下情

上諭諄切查存米穀年久不無虧空霉爛之虞嗣後凡
官員將存倉一應米石虧空霉爛者該督撫題參仍照
革職留任限一年賠補賠完免罪復職如逾一年不能
賠完者解任再限一年賠補賠完仍准復職如二年外
不賠完者照定例擬罪著落家產追賠可也康熙四十
一年十二月初四日題本日奉

旨著行文各省督撫等照此議行可否之處各定議具

奏欽此欽遵相應行文該督撫欽遵施行等因到臣該臣看得存倉米粟關係緊要虧空處分定例甚嚴荷蒙皇上俯念虧空霉爛米石既經賠完者仍行治罪似屬太過復命臣等定議具奏臣恭繹

上諭虧空霉爛米石者蓋謂因米石霉爛以致虧空者耳非謂任意侵蝕至於虧空而可與霉爛者同邀寬典也查倉貯米穀歷年俱經行令加謹收貯至新舊官交代之時又例有開倉盤驗其參雜糠粃及陳腐不堪者

皆鼓扇換補然後收受是則本官任內雖逐年霉爛或所不免然亦不過十分之一二耳今若不計虧空多寡皆准其留任賠補則不肖官員或將米穀盡數侵盜藉口霉爛亦未可知至於僥倖留任之時則又功名心重此一年之內必至私派病民以補空缺以臣愚見嗣後如有虧空發覺指稱霉爛者令該管上司核其所虧分數如于本州縣存貯額內虧三分以下者應如部議革職留任限一年完補復職不完者解任再限一年完補

仍准復職其虧空三分以上者不准混稱霉爛仍應以虧空倉庫論照例解任審明侵那除侵欺按律處分外若果係那移能於解任一年內如數賠完者亦免治罪仍准復職此兩項人如限內不賠完者照定例擬罪著落家產變賠如此則官員既沐

皇上體恤之仁又不得因此而耗倉儲於平時累閭閻於事後似于積貯稍有裨益也伏乞

勅部議覆施行

請汰河工冗員疏

康熙四十二年十月初三日

臣李光地謹題為請汰河工冗員以專職守事竊照永定河設立分司筆帖式等官定例三年限滿保題議敘後于康熙四十年九月內奉

旨筆帖式等官保守年限從今春為始滿日查明保題欽遵在案今三年將滿容臣另行查明具題外臣查永定河兩岸設有分司二員正筆帖式十八員副筆帖式十八員把總四員及情愿在工効力之人甚多雖保守

河工需人料理然員冗則難覈其賢否責專則易課其功過如多容年幼不經事之人夾雜其中不無糜費錢糧貽誤修防之弊臣愚謂此等正副筆帖式似應俟其今年限滿之後量行裁缺其收發錢糧保守工程應留用幾員之處令分司自行酌量揀選呈臣題明永為額設此外俱行裁去倘分司瞻顧情面仍將才具不堪與幼小未諳之人混行保補貽誤河工者應將分司嚴定處分以責實効惟是直屬清河因無歲修錢糧將工程

交與地方官保守永定河既有歲修錢糧又有分防筆
帖式等官所以地方官竝無責成但河工於搶修要緊
之時如僱覓人夫採買物料非州縣官和衷協助或致
呼應不靈嗣後永定河歲修遇有僱夫採買等事似應
令分司足發價銀與沿河之霸州固安永清東安等處
協同僱備如分司發價短少應行參處如州縣僱備怠
玩推諉貽誤者亦降清河一等定為處分之例庶地方
官與河員有共相保護之責其于工程似有裨益也臣

再有請者永定河雖有兩岸而河止一道且兩岸相隔不遠舉目可周若將分司裁去一員只留一員總理河務似為責任專而無彼此隔膜之異是否可行伏乞

聖裁

請發倉賑借仍酌行平糶疏

康熙四十二年十一月初八日

臣李光地謹題為特請發倉賑借仍酌行平糶之法事看得直屬今秋低窪州縣報被水災經臣將永清等處被水民人題請賑借米穀并聲明沿河災甚地方如有

應賑應借之處察明報部等因具題部覆奉

旨行令查明作速賑借并有應賑應借之處察明具題
到日再議等因行據守道宜思恭呈覆前來臣查得永
清寶坻廣平安州四州縣及大名府屬各州縣已準部
文行令分別賑借其餘沿河窪下州縣經報災者如薊
州豐潤玉田武清梁城所慶雲故城鹽山南及青縣滄
州景州靜海天津衛雄縣新安大城以及永清縣之小
惠家庄十二村等處再有不成災而亦被水如吳橋東

光阜城任丘高陽寧晉唐山曲周雞澤清河等處經臣
駁察明白皆應分別賑借以恤窮民但臣伏思今歲米
價比常頗騰發倉以濟貧民之食其施有限而平糶以
出富家之穀為惠無窮今除被災稍甚無力買糶者仍
應分別賑借外其餘所存米穀俱令道府察明實在數
目交與州縣確訪時值量減平糶如時價稍平即復量
減務令富室不得擅囤倉之利庶小民不致有升斗之
艱矣如地方官出納不清實未賑濟及借出米穀假捏

非實至明歲借口民窮不能還倉者除勒該州縣賠補外仍行參處至平糶所賣過價值皆即時解交道府至收成時領買實儲其價值務湏比時值逐漸量減爭差三二十錢之間方許開報如有與時價大相懸絕借口賤賣者必係官吏侵蝕入已仍行追賠參處可也伏乞勅部議覆施行

覆社倉疏

康熙四十三年三月初四日

臣李光地謹題為欽奉

上諭事戶部會議社倉一案奉

旨這事情著差人問直隸巡撫去欽此欽遵臣恭惟

皇上念切休養深求備豫之方既於直隸各省設立常
平倉儲復考古社倉之制分貯鄉村不使有司經管恭
繹

諭旨直隸地方有滿州庄頭可會合數村立一社倉其
管理社倉事宜令於庄頭內有伊等願付托之人選出
交與收貯若係民人村庄公設社倉則於民人內伊等

願付托之人選出交與收貯誠為區畫精詳可以廣積蓄而裨民生者也臣自去歲奉

旨後即通行各府妥議詳籌鼓勸輸將因去歲適值米貴之年富民出穀未能甚多據現在報到永平宣化保定正定順德等府米穀等項二萬七千一百一十二石零尚有順天河間廣平大名數府未經冊報約亦不下一二萬石如今年夏麥秋禾游獲豐登則好義願捐者必益衆矣但立法之始應有成規除旗民村庄俟冊齊

日分別量地設倉收貯看守另行奏聞外可否分上中下歲上歲加謹收貯中歲糶舊貸新下歲量口發賑并應否令地方官勿得預其出入之權但令主其事者每秋後開單報官俾有鈎考伏乞

勅下九卿詳議面請

聖明裁決指訓庶可以遵守奉行貽永利而不至於滋羣弊也臣謹就直隸現行之事條對其各省或土俗不同事宜各別應聽九卿行查臣謹奏請

聖裁

辭大學士不允恭謝疏

康熙四十四年十一月

臣李光地謹題為恭謝

天恩事康熙四十四年十一月二十八日準吏部咨為
微臣叨恩非分冒罪控疏瀝辭仰冀

聖慈俯察誠悃以紓微臣忝竊之咎以安徽臣報効之
心事康熙四十四年十一月十九日奉

旨覽御奏知道了已有成命不必控辭該部知道欽此

欽遵移咨到臣切臣學淺才庸起家寒陋早歲叨登科第歷受

聖朝厚恩謬列清華洊膺卿貳自承

特命提督順天學政繼以巡撫直隸前後九載力小任重愆過多端中間如水利農田河渠堤岸及一切備災振窮之政皆籌自

聖心并有成策且復屢煩

鑾輅巡閱郊畿凡地方事宜莫不面承方畧而臣奉行

無狀績效不彰難逃六計弊吏之條況值三考黜幽之
候恭逢

皇上仁同覆載念其為久次舊臣蕩滌斑瑕保全終始
恩光下照

寵賚宏施真求之千載而難逢矢之三生而莫報者也
伏念臣自守土外吏躡長六卿非分所安至今惕息茲
乃欽承

新命俾佐綸扉

恩出踰涯懼深覆餗昨披瀝微悃仰瀆

聖聰實出惶怖之私心非敢襲控疏之陳迹復荷

恩旨下逮慰諭有加載感載慚措躬無地顧庸虛之陋

質彌凜淵冰撫衰暮之微軀重虞尸素惟有仰承

聖誨勉竭駑鈍依附

天光幸完晚節上觀

皇上萬世無疆之盛化下酬微臣平生未報之恩私而

已為此具本奏聞伏候

勅旨

萬壽六十謝恩疏

康熙五十二年三月

固山貝子領侍衛內大臣滿漢大學士八旗滿州蒙古
漢軍諸臣九卿詹事科道公同謹奏為恭謝

天恩事欽惟

皇上至仁性植景福天申躋一世於春臺享萬年之歷
服大德得壽聖有明徵昌後燕天詩歌炳煥茲者恭逢
萬壽六十自近畿遠省暨於海澨邊陲老幼扶攜奔趨

闕下盈千累萬祝

聖瞻

天此真發于愛戴之公心故不覺其歡呼之同願自三月朔日起至二十一日日霽風和塵霾不掛

輦輅所經萬姓跼伏焚香填塞道路咸得仰觀

芝宇俯愜葵傾蒙

皇上賜席數千張沿途擺設醉飽

天恩普及氓隸逮至祝頌事畢二十二二十三兩日甘

雨應時淋漓普遍貽我來牟兆啟豐穰臣等愚昧有以
窺天意人心上下響應斷斷乎其不爽也更蒙

皇上軫念遠來官民於二十五二十七等日舉行養老
之典且使臣等在朝滿漢大小臣僚齒及格者皆得與
焉

皇上御門親酌臣民老者酒又

命諸皇子皇孫執爵傳觴遍行勸侑二十八日又宴八
旗年老婦人數千於

皇太后宮中隆儀渥澤振古稀聞凡兵民男婦年六十
五以上者

賜緞匹銀兩有差又進臣等於內六十五以上者

賜煖涼帽袍褂靴襪寶硯各有差詩所稱般賚之恩旨
酒之燕衮黼之錫未足為喻也至於舊臣以註誤落職
者

皇上憫其年老還以原官使完晚節其中大臣有逮事
世祖章皇帝者則復

特加宮保以示殊恩故事恩詔封蔭止於現在

特旨准休廢在籍諸臣亦得均霑此皆歷代之所未有也

皇上又手撰諭旨示天下老人以朝廷優養之恩實為
草野風厲之本俾各歸家教導子孫力行孝悌以篤風
化之源以興禮樂之基

訓辭深厚臣等跪讀之下莫不悚然動心焉伏念臣等
學問淺薄躬逢嘉會古昔之所未聞者今日乃得親見

千載一時欣幸何極況乃共沐

恩波光榮逾分感極生愧又未知枯朽之身何以仰酬
雨露於萬一也臣等不勝懼忤感激之至謹合詞具奏
稱謝以聞

進方畧疏

臣李光地謹奏為纂修方畧繕寫已竣恭呈

御覽事臣等恭惟

皇上聖德神功超越前代

御極以來內收叛亂外靖凶殘絕島窮荒靡不歸命納款固已輝煌史冊照耀古今矣乃者厄魯忒逞其鴟張搖我邊鄙屢逆明旨致犯天誅

皇上欲詒中外之治安不憚

聖躬之勞瘁三臨遠塞溫滅元兇自茲萬里朔漠之區同奉五服要荒之職功尤邁於曩昔事宜播之無窮臣等遵奉

綸音纂修方畧祇憑記注用効編摩不敢虛飾一詞庶

幾徵信萬禩惟

淵謨睿慮非管蠡所能窺而

大烈耿光愧覲揚之不盡臣等謹率在館官員人等云

恭請調護

聖躬疏

固山貝子領侍衛內大臣滿漢大學士八旗滿洲蒙古
漢軍諸臣九卿詹事科道公同謹奏為大孝之尊養已

隆

聖躬之調護尤亟伏乞勉循古制俯順輿情事臣等竊
惟

皇太后違豫

皇上憂焦以致頭暈足腫仍勉強親詣寧壽宮看問
皇太后握手心傷復移

御幄次於蒼震門內衣不解帶輾轉中夜未曾安寢

聖躬因而勞瘁頭愈眩暈不能支持臣等不勝恐懼合

詞奉摺懇請回宮奉

旨朕昨住帳幄因體不能支暫移房舍欽此臣等既未
遂回宮之請又恐

皇上至孝純誠

皇太后脫有不虞必欲盡情盡禮仰惟

皇上春秋已高又值時適抱恙倘或哀勞不節此臣等
之所大憂懼也臣等謹案禮稱六十不毀

皇上聖算已瀕七旬矣夫力不能養則有菽水之恨養

不逮年則有風樹之悲古今孝子緣此傷痛今

皇上富有四海以天下養而

皇太后聿躋上壽受備物之奉者幾六十年是

皇太后之福

皇上之孝皆極古今之所稀言念及此

聖情亦可以寬慰矣至於禮之儀節臣等雖愚豈不知

皇上孝思維則為萬世師然考漢儒鄭康成最精於禮

其論國有大憂而君有疾者使子執事朱子深以其言

為是議之於朝即朱子謹禮終身及暮年有疾遇家祭祀坐視子孫拜跪而已此皆禮典之明證前輩所已行伏乞

皇上深抑

聖情俯衷古制如有不諱之事

命諸皇子悉心經紀凡拜跪行走一切勞力禮節

聖躬切未可身親萬分保攝以仰體

宗社之重以上慰

皇太后之心以下愜朝野臣民之望臣等不勝迫切懇
款惶悚之至為此謹奏

榕村集卷二十七

欽定四庫全書

榕村集卷二十八

大學士李光地撰

劄子一

覆發示朱子全書目錄及首卷劄子

臣李光地謹

奏臣伏讀諸臣所進

御纂朱子全書目錄及首卷竊惟朱子平生著述除注

釋諸經諸子如四書集註或問易經本義啓蒙詩傳儀禮經傳通解太極通書西銘註以至韓文考異楚辭辨證參同契考異諸成書外其門人所編文集及語類又不下數百卷弘深奧衍與諸成書相為發明明永樂間所采入性理全書者殊為未備恭遇

皇上特命儒臣依倣門目逐類增入自此朱子譚經論道以及講世務評人物之言披卷粲然無復遺憾誠

聖代表章之盛規儒林折衷之要典也謹詳諸臣所編

皆出文集語類二書而諸成書孤行於世者不復采入
最為得體即明永樂間性理全書所收亦據文集語類
二種不敢離析成書也但閱諸臣採摭尚有易圖說楚
辭註一二條此類似應刪去再詳諸臣各段下所註既
有語類文集等字樣又有朱子經濟文衡性理小註及
朱子節要朱子近思錄等字樣臣愚謂經濟文衡即就
朱子文語編出者似不應或謂之文集或謂之文衡也
性理太極圖等小註即是節取文集語類附入者只應

於性理本篇中兼載亦似不應纂入他處另立小註名
色又明邱濬有朱子學的高攀龍有朱子節要近年汪
某者合二書為朱子近思錄此等書皆出於文集語類
之後所采俱在文集語類之中亦似不應另立名色臣
愚竊謂性理原文每類皆應悉仍其舊其下註六字云
以上性理原文其餘續添者出文集則註明文集出語
類則註明語類而總註四字云以上續入此外諸書名
色總不出文集語類二書之中似可無庸分別伏候

聖裁

進朱子全書首卷并請改定書名劄子

臣李光地謹

奏臣於四月十二日蒙

皇上面發朱子全書首卷一冊并稿本一冊命臣接原
任左都御史臣吳涵編次仍與原任大學士臣熊賜履
商議酌定者欽此臣等即會同重加校勘增改註明語
類若干條文集若干條其出自文集應註明某篇者亦

逐一註於每條之下今另將首卷繕寫進呈恭惟

皇上躬膺千載之道統默契列聖之心傳於近世儒哲
尤特重朱子之書自深宮以至巡省無不留神覽閱其
選擇之精折衷之當誠非臣等愚陋所能仰窺萬一伏
候

皇上睿覽裁定發下臣等又伏思

御纂之盛意蓋分別門目以便學者誦習所以嘉惠天
下後世至明切也書名應否改為類書統候

聖裁以光大典謹具摺奏

聞

進朱子全書第三冊并請改祭祀神永目劄子

臣熊賜履李光地謹

奏本月十五日蒙

皇上發回朱子全書首冊次冊凡四本臣等祇受捧讀
其第二冊內簽二處謹已欽遵改正仰見

皇上覽閱精詳無微不至臣等雖校讐數十過不能及

也所有校畢第三冊相應一并呈進內有論祭祀神示
一目臣等切思上篇既有祭祀祖考神示則此篇之義
已包之矣今語類及性理大全復以祭祀神示為目似
涉重複且神示者謂天神地示皆尊稱也細尋此篇所
論多世俗怪神土木淫祠之類則統以神示之號似亦
非宜臣等謹擬改為雜論祭祀鬼神未知可否旁貼浮
簽統候

聖裁謹具摺以

聞

賜諭停覽朱子全書覆奏劄子

臣熊賜履李光地恭請

聖安七月三十日學士等自

行在寄信到臣等內開七月二十八日傳

旨前發朱子全書第二冊第三冊後微有目熱多淚一

切奏章照常批發而朱子書尚未能細閱即書字亦未
曾寫近時存養目光今已全愈仍當朝夕披覽爾等可

傳諭大學士李光地知之勿謂朕久疎文翰也欽此臣等恭惟

皇上念典之勤前超漢宋心傳之妙上接唐虞不特臣等曲學末光難賡二曜即古來理義象數盡炳中天矣而猶宅衷彌虛遜志時敏就將不倦動巽無疆偶因觸熱而停披即以惜陰而賜諭跪讀之下備見

聖心退誦之餘祇增臣愧伏惟緝熙者日月之運傾向者葵藿之私仰祈頤養

天和稍紓

睿覽俯徇誠款庶遂瞻依臣等不勝感激懇悃之至

條奏朱子全書目錄次第劄子

臣李光地恭請

皇上萬安本月初二日南書房發出朱子書一封

御筆批此書送南書房交大學士李光地欽此臣祇領
檢讀已欽遵指示改正訖所有繕就第十二卷至第十
四卷謹送交南書房進呈伏求

聖誨臣查前進呈目錄內其讀書法及讀經讀史等題
原在力行教人人倫等題之後臣愚陋淺見切惟讀書
窮理乃一事也故朱子行宮便殿奏劄有云為學之道
莫先於窮理窮理之要必在於讀書此朱子告君之定
論也然則讀書法與讀經史諸題似應與致知相次不
應在力行之後又有理欲義利君子小人之辨一題原
在力行條下臣愚切惟明辨于理欲義利君子小人之
際實致知之事也辨之明知之真然後行之果而守之

固則此題似亦當與致知相次不應在力行條下臣謹
稍移其序繕卷進呈但恐愚昧寡識於理有悖伏乞
皇上明賜指誨以啓迷蒙或應仍舊即可改正另行繕
寫臣又更有請者查原目錄內首十數卷論學之後即
繼以四書六經諸儒諸子歷代人物等目然後及於治
道臣切惟大學格致誠正與齊治平相為表裏孔子告
君達德達道與九經相為經緯蓋天德王道同條共貫
自堯舜禹湯至我

皇上皆然也臣妄謂首十數卷論學之後似即宜繼以論治而論治諸目則宜以奏疏為首然後以君道臣道養教兵刑用人理財等目次之如此則開篇數十卷之中而內聖外王之道備矣然後繼以四書六經以證明之又繼以聖賢諸儒諸子百家以折衷之又繼以歷代人物以參考之似為得先後緩急之序而使天下後世學者知為學為治之出於一不作兩意推求也臣無知臆度愚妄已甚今繕至四書暫停候

聖旨明訓或可接寫治道或應仍舊接寫四書六經等
類統容臣遵訓行臣又按朱子當日有手自紀錄與蔡
元定講論之語名曰翁季錄者此書自宋人罕見之然
近年家有此書後雖兵火失落則是猶留傳於人間也
恭遇

聖駕南巡乞

旨下獻此書者給賞倘幸而復得以備朱子之微言則
萬世學者幸甚臣煩瀆

聖聽不勝悚惕之至

命移商熊賜履朱子全書條目覆奏劄子

臣李光地恭請

皇上萬安臣於本年六月初二日奉

旨朱子全書關係緊要交與熊賜履李光地纂修今所
奏目錄次序有未畫一之處著李光地移會熊賜履商
酌妥當畫一奏明然後將書呈進又於本日奉

旨此書完竣欲發與熊賜履看若到彼時有所辯駁則

從頭更張必致擔閣而書無完期矣須乘此時商酌妥當則趲日纂修方無遲悞欽此臣即具書并詳列應商條件連前後寫就書卷專差家人前往江寧府投遞熊賜履家今得其回答手劄於七月十七日到京其現在論知行處數卷臣已依熊賜履舊目編纂經熊賜履留去人住三日一一看訖今恭呈

聖覽乞

睿裁指示所有向後目錄臣恐路遠難以零星商議總

列劄後俟熊賜履逐條批定今得回字令臣於重複處酌而刪之謹將熊賜履回答原劄附呈

聖覽以後編纂庶幾畫一無復參差以仰副

聖主鄭重責成之意臣不勝戀慕悚切之至

請發朱子全書磨對劄子

臣李光地謹

奏臣奉修

御纂朱子全書所有未完各類謹繕寫為八卷恭呈

聖覽通計全書凡八十二卷其目錄次第遵依

聖諭以四書六經為首然後分類編次自理氣以下至于詩文而止奏牘及自著書序跋兩類舊目所無皆遵旨添入者謹將目錄一卷一併呈覽臣竊惟朱子之學粹然孔孟之傳誠有功於人心有裨於世教元明以來雖家誦戶習然未有傳其心嗜其書躬踐其道於修身齊家之間而實驗其效於治國平天下之遠如我

皇上者所謂先聖後聖如合符節孟子之言信不為誣

此書之纂條條皆經

皇上覽閱斟酌間有筆畫及句讀訛謬隨貼內簽命臣改正近又面奉

諭旨首以四書六經次分門類足見朱子平生精力盡在研究經書之指而闡明之平生議論無非源本經書之指而發揮之朱子之學即孔孟之學一披卷而原委昭然矣

聖見高明尤非從來諸儒編集以流傳於世者所能幾

望萬一也臣愚昧淺謏雖一一稟承

聖誨繕寫成編次第進呈已畢然此書關係甚大伏乞
聖明裁定之餘召臣面諭可否有臣愚陋未能通曉者
因得隨事面請逐句記憶以便遵行又書之卷數既多
前後恐不無重複參錯更乞

皇上全覽後盡行發下容臣通融全部一一磨對如有
重複參錯之處更改抽換另繕進呈庶幾不至譌舛以
干罪戾臣不勝惶悚

進校完朱子全書劄子

臣李光地謹

奏前因臣承修朱子全書告竣面請

聖旨乞將陸續進呈卷冊盡賜發下便臣從頭磨對其
目錄次第奉

旨改正者逐處改正或因篇帙浩繁前後有重複參錯
應抽換者逐處抽換荷蒙

俞允將全書發下已兩月餘臣謹細加覆閱逐類編摩

所有目錄次第悉遵

諭旨釐定卷數內有重複數十條及遺漏數條俱已更換補備訖凡為卷八十三分作五十五冊裝成八套相應恭進

御覽仍將奉

旨并請

旨條件開列于左

一性理語類諸書所分門目原以理氣太極陰陽為首

臣面奉

天語朱子平生功夫在於發明四書六經須以四書六經為首臣仰見

睿識高卓遠出宋元明諸儒萬萬片言之下遂令朱子之書規模一新矣謹遵依序列編端然後繼以分門云

一朱子有萬言封事數篇竭忠愛之誠心實理亂之龜鑑若破析分入各類則無以見其立言先後本末委

曲詳盡之致臣面奉

天語奏疏須自為一門不可破析

聖見高明又從來編集類書者之所未知也謹遵依另
立門目以封事奏劄論道經邦者居前以謝恩辭官
進禮退義者居後俱錄全文不敢破析

一臣於

聖駕避暑前請

旨奏疏敘於朱子內外任之後荷蒙

聖俞今遵依列序

一臣於

聖駕避暑前請

旨治道中所有細目次序頗覺雜亂似當畧倣六曹職掌次第編列荷蒙

聖俞今遵依更行寫定

以上數條皆係奉

旨事理其餘篇目先後繁簡俱是熊賜履在時與臣斟

酌議定者無所更改

一理氣門類下細目先以總論次太極次天地次天度
歷法次天文次雷電風雨雪雹霜露次陰陽五行時
令次地理潮汐臣愚見竊謂陰陽五行時令似應接
太極天地之後蓋周子太極圖說首言太極即繼以
陰陽兩儀五行四時也天度歷法似應接天文之後
蓋有日月星辰然後有行度然後有歷法也地理似
應即繼天文天度歷法之後蓋有天文即有地理也

雷電風雨雪電霜露似應在地理之後蓋此數者不可謂之天文乃地氣上交於天絪縕聚散於兩間者則當附天地之後也然臣所見未能確當故原本不敢更改謹別寫二冊另封請

聖諭教誨或可采則乞發下南書房詞臣檢對換入如無當於理則仍用原本統希

皇上裁定施行

覆朱子全書刪節幾條劄子

臣李光地謹

奏魏廷珍王蘭生梅穀成傳

旨十月初五日奉

旨朱子全書已看完選得皆妥當惟吾與點也章太多
有可刪者就刪去幾條欽此臣謹遵

旨覆閱此章所收果屬冗長其間說曾點實能為堯舜
事業處亦似稍有過當恐門人記錄朱子之言不能無
誤謹擬刪六條逐處簽貼乞

聖裁十月初八日奉

旨其次致曲章問其次致曲條隨其善端發見於此便就此上推致以造其極發見於彼便就彼上推致以造其極與引蘇軾數語其意有似乎釋氏所謂專用想於一處而不他適者見李光地說與他仔細想若於道理無害就存著若有啓人疑惑處就去了欽此臣仰見皇上辨理之精入於毫芒非臣等粗淺之慮所能至也細看後數行以仁義為言又似不礙儒者功夫乞

聖裁十月初九日奉

旨易首卷一二三四九八七六最妙條註云丙丁合辛
壬合有錯否問李光地欽此臣按十干日數丙與辛合
丁與壬合今云丙丁合辛壬合意未明白

聖覽極是上一合字似當改作與字乞

聖裁

覆發示圖象第一劄子

臣李光地謹

奏本月初九日蒙

行在發到臣易學圖說共三件仍奉

上諭朕避暑山莊常多幾暇參河洛數目偶得數之合
於古書者有幾條欲問通達易理者無一人知道卿留
心易學最久且明若細察可以知朕之用心矣但易理
無窮失傳已久此圖此論未必甚當況自己之意見不
敢即為是卿看此論自然明白若未合於理者直言勿
隱倘有些須可用者朕再細察另畫圖樣併用法開列

寫去欽此恭惟

皇上聖學淵深妙極道數發遺經之閫奧探皇古之端倪蓋有歷代鉅宿名儒所未能測窺者臣章句末學所知不踰文義之近忽承封示

聖製圖書又

賜諭旨令臣詳看且許以直言無隱臣伏讀連日茫不得其涯涘真如籬鷄之乘長風井蛙之遊滄海目眩心迷疑是而非雖欲從之末由也已賴

皇上條畫詳明立象以盡意撮要以盡言俾臣下愚亦得按圖循文粗見髣髴至於蹟理精義尚多未通恭遵諭旨敬附所知逐條開列于後其愚蒙未曉了者亦因奏請

聖誨自省於高深無所發明惶悚累息言多舛差伏乞聖慈矜恕

一天尊地卑圖次第相乘得天地始終全數臣恭繹此圖正與司馬光潛虛圖樣相同但司馬光衍河圖數

一一得一 二二得四 三三得九 四四得十六 五五得二十五 六六得三十六 七七得四十九 八八得六十四 九九得八十一 十十得百合之得三百八十五數雖有合於易爻三百八十四中含虛一之理但天地之大數猶未全也今以所得乘數遂旋相乘極於三百六十二萬八千八百然後天地終始之數周而無餘變化盡而能事畢矣

一三皇歲數臣謹按邵雍之說謂一元有十二會如一

年有十二月天開於子如一年之子月陽氣回也地
闢於丑如一年之丑月土膏動也人生於寅如一年
之寅月萬物萌芽也儒者取此以證三皇之說故謂
天皇十二人是十二會全數各一萬八百歲者每會
一萬八百年也地皇十一人是從丑會筭起去子會
而言也亦各一萬八百歲者每會亦一萬八百年也
人皇九人是從寅會開物算起至戌會閉物而盡前
去子丑後去亥而言也亦各一萬八百歲者每會亦

一萬八百年也據此說則當依綱鑑補作一萬八百
者為是但據此說又須改古書十三為十二方合又
一本作人皇兄弟九人合四萬五千六百歲按九會
之數九萬七千二百年今以開闢至中天折半算得
四萬八千六百年亦須改古書五千為八千方合未
知是否

一河圖衍六層之數臣恭繹圖象河圖四面之數衍以
六層凡三百有六十當期之日而且縱橫與天地之

數無往不合可謂妙矣又按朱子說著策亦起于河圖四面其西之老陽九合於北之太陰六其東之少陰八合於南之少陽七皆得三百六十今玩

聖意所衍則其西其北之數得百八十亦老陽老陰之合也其東其南之數得百八十亦少陽少陰之合也著策所謂當期之日者實以此為根原此朱子所未言至

皇上而始發者矣

臣自少受經於文義多所未通前儒訓解亦未詳晰如
尚書洪範曰月之從星則以風雨切疑日行月行俱
經列宿而獨云月之從星何哉又禮記禮運篇曰天
秉陽垂日星地秉陰竅於山川播五行於四時和而
後月生也是以三五而盈三五而闕又切疑天有三
光日月星皆懸象於天者也今獨云天垂日星而以
月為天地之和何哉積思累年猶未省豁今伏讀圖
說乃悟所謂月之從星云者不獨謂風雨陰類月實

主之蓋其行度一日而離一宿故以二十八日遍歷
周天二十八舍此則月從星之義也又悟恒星與七
政獨月與人最近故凡萬物胎產皆以月為節

皇上所謂月字乃肉字係於下土居中為人者豈非天
道聖奧精微不傳之蘊哉惟月為天地之和故人為
陰陽之會孔子禮運特揭之指於是可通矣且

皇上之發明人道又不特此也恭翫諸圖皆以天地二
者之數合而成人因悟洛書四正四維之位其一二

九七順而左旋以相乘者參天之數也二四八六逆而右行以相乘者兩地之數也中五特立而自乘者乃天三地二之合是人位也人為天地之心而皇又為人類之首故洪範於中五曰建皇極明乎天地之性全具於人立人之道皇為之標皇極建則上天下地之理於此合矣由此觀之古所謂三皇者即皇極之皇也天皇云者猶言天之帝耳地皇云者猶言地之祇耳人皇云者則正謂繼天地統萬類之主洪範

所謂為天下王者是也其所著人歲之數不過推元會以見三才並立之原始表歷數以示皇極配天之無疆古書多隱語故神奇其說如此耳豈真有兄弟迭興沕沕穆穆於羲黃堯舜之前者哉我

皇上既以三皇之號盡歸之理數又以天地之道悉統之人皇足以破邃古之荒唐啓河洛之秘要

皇上之膺道統而衍心傳者於是在矣臣幸荷

聖教畧有開悟然螢燭之光所照咫尺恭遵

聖諭揣度妄言譬如捏眼生花總非實象自知庸謬悚
慄良深伏乞

皇上裁削開示

覆發示圖象第二劄子

臣李光地謹

奏本月十九日臣因奏摺奉

御批卿之所看極詳摺內有洛書四正四維之位其一
三九七順而左旋者參天之數也中五特立乃天三地

二之合人位也等語正在第二次發去圖中所有之理卿未見之前已知之矣不用朕多諭今將大圖隨報帶去卿再細察便知又

批自三三圖至十十圖在算法統宗內有其理全無欽此臣謹披圖伏讀歷晷移辰未能得其端緒恭惟

皇上躬上聖之姿性與天合而且探蹟索隱積慮功深豈臣愚下淺陋一二日之間所能曉了潛神累夜畧見端倪但恐億度之言不能屢中謹條列所見恭求

聖主教誨以指迷蒙

一大圖所衍河圖全數有微圓積數之法有平方乘法
有立方乘法逐位注明逐層結斷算術源流已盡於
斯然從來為算學者率於本源未徹惟我

皇上心通至道即數窮神寫天象地形之真發太極三
極之奧放結繩而作天尊地卑之圖若網在綱有條
不紊不獨操籌握算者通之其用至博而窮理盡性
者得之其妙無窮矣

一微圓逐層積數與三三至百子八圖相為表裏然則微圓積數者三極之天象也八圖者亦容方之地形也天圓地方之象天三地四之數皆於是乎顯矣

一臣謹按三三圖者即洛書之數神禹所為叙九疇也從來說洛書者皆以五行生剋言之惟三三兩字最盡其妙蓋神禹所叙者三才之理而又三其三以為九疇也

一臣謹按四四圖者易互卦之數也易卦有六十四以

中四爻互之只得十六邵子所謂四象相交成十六事者是也

一臣謹按五五圖者古龜卜之數也龜卜之數起于五行洪範所謂雨霽蒙驛克者是也重之為二十五又重之為一百二十五周禮所謂其體百有二十者去五純體故云百有二十也今其法雖不傳然洪範周禮注疏尚可攷

一臣謹按六六圖者甲子之數也干支相乘究於六十

六其六而一年之數周矣

一臣謹按七七圖者著數也大衍之數五十而其用止於四十有九蓋一年三百六十五日四分日之一以日法四乘之得一千四百六十一以月法三十除之得四十八十分之七四十八者著之揲策也應三百六十日之整數也十分之七者著之掛策也應五日四分日之一之盈分也故孔子繫辭傳以之象二氣四時期月閏法蓋為此也

一臣謹按八八圖者卦數也易卦有八重之為六十四
一臣謹按九九圖者算法之總數也數有十而用止於
九蓋至十則還於一而十無位故也此數之所以乘
除消長而無終窮隸首造九章與伏羲畫八卦同功
者以此

一以上諸圖者天地文理粲列于其中羣聖制作範圍
於其內顧自理數之學分裂而聖人之奧不傳至我
皇上然後天人之道一以貫之歷數在躬造化在手萬

幾之暇研極深微羅列諸圖溯厥原本自羲農以來
不傳之精蘊揭於中天矣

一十九歲一章氣朔分齊每歲十二月得二百二十八
箇月并七閏月為二百三十五也圖中下層硃書十
九上列墨書二三五恐是此數

一二十八歲七閏日之法及圖下層硃書二八上列添
墨書三字臣未能通曉姑以妄意揣測每年三百六
十五日四分日之一其三百六十五日整日也四分

日之一者零分也零分積至四年又成一整日古歷
法謂之景復者是也四七二十八故零分之積至二
十八歲當得七日此二十八歲七閏日之說也二八
兩字之上添注三字者蓋以月二十八日週天之數
計之則一歲凡十三週天又餘一日四分日之一也
若以週天十二為一歲則每歲只得三百三十六日
計二十八歲之中得月週天之歲二十八得月週天
之月二十八得所餘之日又二十八而七日之閏分

尚在其外因歲月日三者皆二十八故圖中注三字
於二八之上或是此意未審是否伏乞

皇上明白指示

覆發示圖象第三劄子

臣李光地謹

奏本月初一日臣因奏摺奉

聖諭七日來復的意思大槩有了未必全是卿十分留
心朕以理數為根件件要細察圖還有好些若全發去

念卿閣內事多有年紀之人恐累著所以卿摺字到時
纔發去欽此臣謹將發下圖一幅說一冊熟讀精思僅
得彷彿蓋天之道極其廣大而理數之學窮於幽微
雖蒙

皇上前後以圖說開示因此推彼畧能明其大意然至
於聞一知十以達於性道之淵源觸類引伸而畢乎天
下之能事則非微臣之所及也況臣素之所學僅能記
誦經文解說詁義拘於末習迷彼大方是以連日伏觀

聖製始則駭而驚繼則疑而思稍有所得乃欣然以喜但所揣摩而似是未必義理之誠然恭逢

聖人不敢自匿謹陳疑悟之端雜以膚凡之論伏候

聖誨以啓愚蒙

一臣伏讀七日來復之說乃知前日圖說不特以十九歲七閏月二十八歲七閏日而盡來復之義也蓋七之為數乃歷算之根何則天三地四者理數之原也勾三股四者算法之本也以天三地二言之則五數

者二三兩數之合也以天三地四言之則五五之積者三三四四兩積之合也故五為人數合德天地而與之相配也三三之積九四四之積十六五五之積二十五并之得五十然開而方之則不盡一數而止於四十九故曰大衍之數五十其用四十有九也自聖人以四十有九定大衍之數故方圓圍積算法莫不以七而定蓋方者徑七則圍二十八四其七之數也圓者徑七則圍二十二其七而有餘之數也由

是以起方圓之積則方積十四者其中含圓積必十一猶之二十八與二十二也圓中又復含方其積必七半外方之積數也然則大衍之數七七四十九者豈非歷算之根乎若以其理論之則乾之太陽窮於九而震之少陽生於七故在易坤震之卦曰七日來復復其見天地之心乎又曰躋于九陵勿逐七日得又曰婦喪其茀勿逐七日得凡言吉利之占皆以七日言之則七者又豈非陽生之始天地人之心之會

乎顧理學至微而數學至蹟是以從來未有發斯義者我

皇上以天授之智加極研之功探厥根源創為圖象臣愚初聞之茫不省其意指伏思累夜粗覺開明然所得僅止於此爾譬如偃鼠飲河自謂腹滿烏足以議夫萬里之汪洋哉

一臣伏觀天尊地卑圖與七日來復圖實相表裏蓋天尊地卑圖者河圖之全數也七日來復圖者大衍之

用數也河圖之數除其一二三為三才之尊位自四至十凡四十九數則大衍之策也夫自四至十共七位而七居其中故七者中位也四與十合為兩七之數五與九亦合為兩七之數六與八又合為兩七之數分居六位而七七之數備矣

一臣伏觀易卦加倍圖窮盡精妙真從來所未有蓋自太乙肇判分而為二其第二變為四象則左一右一者純陰純陽也中間二者陰交於陽陽交於陰也三

變為八卦則左一右一者純陰純陽也中間則陽交陰者三陰交陽者三也第四變為十六象則左一右一者純陰純陽也中間則一陽三陰者四一陰三陽者四陰陽相半者六也第五變為三十二象則左一右一者純陰純陽也中間則一陽四陰者五一陰四陽者五二陽三陰者十二陰三陽者十也第六變為六十四卦則左一右一者純陰純陽也中間則一陽五陰者六一陰五陽者六二陽四陰者十五二陰四

陽者十五陰陽相半者二十也其數既井然而有條
而其理則尤有精焉者蓋左右之純陰純陽天地之
象也中間陰陽相交四時五行變化之象也易曰天
地定位而易行乎其中矣故乾坤為易之門謂如門
之左右兩扉一闔一闔而千變萬化於是乎出入也
以此圖括先天之要可謂數顯而理明法簡而道大
者矣

一臣謹按陰陽之數雖各居其半然陽饒陰乏陽多陰

少故數之有餘者必歸之於陽其不足者必歸之於陰此非聖人以意為之蓋造化尊陽之理天地生物之心其本來如此也故乾坤二策當期之日然乾之策二百一十有六則七月而有奇坤之策百四十有四則五月而不足此邵雍所謂開物於寅末至戌初而後閉物者今

皇上復以晨昏之景日距地平之度推之其數尤為吻合其理尤為神妙

皇上之扶陽抑陰撥亂開治進君子而退小人者臣於此圖見之矣臣愚昧無識統求

聖誨

覆發示圖象第四劄子

臣李光地謹

奏八月初十日蒙

御批奏摺卿留心河洛久矣見來書愈知理明識遠此事非卿萬不能辦其是非但筆墨不能盡處甚多容朕

回宮面諭商量目前有幾圖卿看又

批圖還未定次序前後有些參差欽此臣末學庸陋從
幼雖受易經而乏師寡承姿性蒙昧河洛精蘊萬未一
窺伏惟此經所言固皆道德性命之奧然其淵源寔起
於圖書苟象數未能精通則義理亦無根據自壬午之
冬

聖駕南巡臣扈從至德州

皇上指示算法大畧並賜

御修秘書雖以庸謏衰老不能竟學而啓教之下粗知
意味故於方圓勾股之形參兩乘除之算畧能辨其縱
橫而數其一二以之與河圖洛書卦畫著策相證蓋不
啻相為經緯而若合符節也是臣雖白首窮經實賴

皇上聖誨稍得端緒今又蒙前後發示諸圖契悟精深
制作詳密通理數天人而一貫合義文周孔以大同臣
何幸得以垂暮而窮域外之觀以下士而與見知之列
上慶遭逢之幸下慙學業之疎惟有恭披圖象一一規

摹祇藏名山永為世寶動觀靜玩或者雖愚而必明俯
誦仰思幸免無聞以終老謹將疑悟大端開列于後自
知未必有當伏求

皇上批駁教示

臣謹按物之圓者每以六而包一虛其中則六也實其
中則七也物之方者每以八而包一虛其中則八也
實其中則九也陽實陰虛故九七為陽數六八為陰
數然則陰陽之純者獨七八耳九雖老陽而實積方

之所成則陽已將變而為陰六雖老陰而乃積圓之
所得則陰已將變而為陽易之七日所以為純陽八
月所以為純陰而用九用六所以為陰陽之變者此
也今伏觀

皇上所立之圖三角者雖數九而象乾然三角之形裁
成勾股則一變而為正方六角者雖數六而象坤然
六角之形徑一圍三則又一變而為渾圓矣方圓相
變天地相銜圖中無窮之妙如此

臣又謹按從來說圖書者皆以五行相生相剋立論雖亦理之一端而其說頗膚淺蓋河圖所蘊乃陽奇陰耦二氣流行之序而其中數則太極也洛書所具乃參天兩地方圓相包之形而其中數則皇極也太極者周子所謂無極之真是也皇極者周子所謂定之以中正仁義立人極者是也此義禹畫卦叙範所以為天啓文明之運而萬世道統治統之宗也今所建天尊地卑一圖其外之三角形則陽奇而天參之數

也其內之六角形則陰耦而地兩之數也最上一點則在天為太極之象也最中一點則在人為皇極之象也此圖實合圖書之理混而一之者也非

皇上身膺道統治統之傳而心契伏羲神禹之妙其孰能與於此哉然河圖洛書所謂太極皇極者皆以中五之最中一點當之


皇上聖圖其上一點在第一位中一點在第七位臣愚以為與中五之理實相貫通何則天雖有五氣其實

一元也人雖有五常其實一誠也故一與五無異也
天有五星合日月而為七地有五行合陰陽而為七
人有五性合健順而為七故五與七無異也孔子曰
禮始於太乙又曰人者天地之心也大圖之最上一
點在第一位者所謂太乙者也其最中一點在第七
位者所謂七日來復而見天地之心者也易範之理
千載同符河洛之精萬形一貫

皇上所闡圖書之奧指妙義大約與周子太極邵子先

天相為表裏信乎百世之上百世之下有聖人出焉
而此心此理同也伏乞

聖慈裁教



榕村集卷二十八